



Llywodraeth Cymru
Welsh Government

DATGANIAD YSGRIFENEDIG GAN LYWODRAETH CYMRU

TEITL	Rheoliadau Rheolaethau Swyddogol, Iechyd Planhigion, Hadau a Thatws Hadyd (Diwygio ac ati) 2021
DYDDIAD	10 Mawrth 2021
GAN	Rebecca Evans AS, Y Gweinidog Cyllid a'r Trefnydd

OS a osodwyd yn Senedd y DU, sy'n diwygio is-ddeddfwriaeth mewn maes datganoledig

Rheoliadau Rheolaethau Swyddogol, Iechyd Planhigion, Hadau a Thatws Hadyd (Diwygio ac ati) 2021

Mae Rheoliadau 2021 yn diwygio neu'n dirymu'r ddeddfwriaeth ganlynol:

Diwygio Deddfwriaeth yr UE

- Rheoliad (UE) 2016/2031 ("y Rheoliad Iechyd Planhigion") ar fesurau i amddiffyn rhag plâu planhigion;
- Rheoliad Gweithredu'r Comisiwn (UE) 2019/2072 ("Rheoliad Amodau Ffytioiechydol") sy'n pennu amodau unffurf ar gyfer rhoi Rheoliad (UE) 2016/2031 ar waith;
- Rheoliad Gweithredu'r Comisiwn (UE) 2020/1217 ar randdirymu Rheoliad Gweithredu (UE) 2019/2072 sy'n ymwneud â chyflwyno corblanhigion naturiol neu artiffisial i'r UE, ar gyfer plannu *Chamaecyparis Spach*, *Juniperus L.* a rhywogaethau penodol o *Pinus L.*, sy'n tarddu o Japan;
- Rheoliad Gweithredu'r Comisiwn (UE) 2020/1231 ar fformat a chyfarwyddiadau adroddiadau blynyddol ar ganlyniadau arolygon ac ar fformat rhaglenni arolygu amflynyddol a'r trefniadau ymarferol y darperir ar eu cyfer yn eu tro yn Erthyglau 22 a 23 o Reoliad (UE) 2016/2031;a
- Rheoliad Gweithredu'r Comisiwn (UE) 2019/66 ar reolau ar drefniadau ymarferol unffurf ar gyfer cynnal rheolaethau swyddogol ar blanhigion, cynnyrch planhigion a gwrthrychau eraill er mwyn dilysu eu bod yn cydymffurfio â Rheolau'r Undeb ar fesurau i amddiffyn rhag plâu planhigion sy'n gymwys i'r nwyddau hynny.

Diddymu Deddfwriaeth yr UE

- Rheoliad Gweithredu'r Comisiwn (UE) 2020/1292 o ran mesurau i wahardd *Agrilus planipennis Fairmaire* o'r Wcraïn rhag cael mynediad i'r Undeb; a
- Penderfyniad Gweithredu'r Comisiwn (UE) 2020/1549 sy'n dirymu Penderfyniad 2004/200/EC ar fesurau i rwystro feirws mosaig *Pepino* rhag cael ei gyflwyno i'r Gymuned a'i ledaenu ynddi.

Diwygio Is-ddeddfwriaeth

- Rheoliadau Marchnata Hadau 2011;
- Rheoliadau Tatws Hadyd (Lloegr) 2015;
- Rheoliadau Iechyd Anifeiliaid, Iechyd Planhigion, Hadau a Thatws Hadyd (Diwygio) (Ymadael â'r UE) 2019; a
- Rheoliadau Rheolaethau Swyddogol ac Amodau Ffytioiechydol (Diwygio) 2021.

Unrhyw effaith y gall yr offeryn statudol ei chael ar gymhwysedd deddfwriaethol Senedd Cymru a/neu gymhwysedd gweithredol Gweinidogion Cymru

Mae Rheoliadau 2021 yn rhoi swyddogaeth i Weinidogion Cymru heb lyffethair fel 'Awdurdod Cymwys'. Maent yn rhoi swyddogaethau hefyd i Gorff Cenedlaethol Prydain Fawr a'r Deyrnas Unedig ar gyfer Amddiffyn Planhigion. Gall y swyddogaethau hyn at ddiben paragraff 8(1) o Atodlen 7B i Ddeddf Llywodraeth Cymru 2006 fod yn swyddogaethau awdurdod a ddargedwir. Gallent felly o bosibl gyfyngu ar gymhwysedd Senedd Cymru yn y dyfodol.

Diben y diwygiadau

Mae'r diwygiadau a gyflwynir gan Reoliadau 2021 yn ddiwygiadau sy'n ymwneud â gweithrediad technegol ac nid ydynt yn newid polisi. Pwrpas Rheoliadau 2021 yw sicrhau bod y mesurau ar gyfer rheoli iechyd planhigion yn gweithio'n effeithiol i ddiogelu biddiogelwch ac yn cefnogi masnach rhwng Prydain Fawr a thrydydd gwledydd perthnasol.

Mae Rheoliadau 2021 yn cywiro diffygion na chawsant eu cywiro'n llawn gan Reoliadau ymadael â'r UE blaenorol sy'n ymwneud ag iechyd planhigion. Maent yn diwygio penderfyniadau'r UE hefyd, mewn perthynas â Phrydain Fawr, a gawsant eu cyflwyno ar ôl pennu ffurf derfynol drafft Rheoliadau ymadael â'r UE blaenorol sy'n ymwneud ag iechyd planhigion.

Mae Rheoliadau 2021 yn addasu Rheoliad Gweithredu'r Comisiwn (UE) 2019/66 er mwyn nodi pa mor aml y dylid cynnal archwiliadau ffisegol a gwiriadau adnabod ar rai planhigion a reoleiddir, cynhyrchion planhigion a gwrthrychau eraill a fewnforir i Brydain Fawr o aelod-wladwriaethau'r UE, y Swistir a Liechtenstein, ar sail y risg y mae pob un yn ei achosi.

Mae Rheoliadau 2021 hefyd yn gwneud nifer fach o gywiriadau i is-ddeddfwriaeth sy'n berthnasol i Loegr ac is-ddeddfwriaeth sy'n berthnasol i Brydain Fawr.

Mae Rheoliadau 2020 a'u Memorandwm Esboniadol, sy'n gosod manylion tarddiad, diben ac effaith y diwygiadau, ar gael yma:

<https://www.gov.uk/eu-withdrawal-act-2018-statutory-instruments/the-official-controls-plant-health-seeds-and-seed-potatoes-amendment-etc-dot-regulations-2021>

Pam y cafodd cydsyniad ei roi

Mae cydsyniad wedi'i roi i Lywodraeth y DU wneud y cywiriadau hyn mewn cysylltiad â Chymru ac ar ei rhan er sicrhau effeithlonrwydd a hwylustod ac oherwydd natur dechnegol y diwygiadau. Mae'r diwygiadau wedi'u hystyried yn llawn ac nid ydynt yn newid polisi. Mae hyn yn unol â'r egwyddorion ar gyfer cywiro y cytunwyd arnynt gan Is-bwyllgor y Cabinet ar Gyfnod Pontio Ewrop ym mis Mai.